



Tegia da Cavardiras – qua procuran Manuela Fischer e ses ami Ueli Wiesmann per il bainstar dals alpinists.

FOTOS S. BÖSCH



Guardiachamona ed artista – Mena Fischer realisescha sin 2649 meters er acziuns d'art. L'on passà ha l'ARD rapportà surlonder.

«Bergfieber» preschenta dudesch dunnas

Ier è stada la vernissascha a Berna

DA CLAUDIA CADRUVI / ANR

■ Il cudesch «Bergfieber» purtre-scha dudesch dunnas che lavuran sco guardiachamona. L'autura Daniela Schwegler ha discuri cun ellas davart lur derivanza, nevadas da stad, chatschs da giasts e dis en tutta solitariad. Tegias nua ch'ins dorma sin matratches u ustarias da gurmet sin 3000 meters – las chamonas en las Alps svizas han da tuttas fatschas e cun quellas er ils carstgauns che procuran là di per di per il bainstar dals giasts.

Il cudesch «Bergfieber» da la chasa editura Rotpunkt mussa la vita da dudesch dunnas che mainan chamonas. Tranter questas guardiachamonas chat-tan ins tipicas muntagnardas, dunnas da la citad, mammas, singles, mastergnantas u academicheras. La fevra da muntogna ha tschiffà tuttas. Perquai turnan el-las mintga stad en las muntognas nua ch'ellas diregian cun inschign, gnerva e talent d'improvisar lur teams.

Mena en la tegia da Cavardias

La grafichera ed artista *Manuela Fischer* – u simplamain Mena – lavura uschiglio en in atelier da grafica a Winterthur. La stad è ella da chattar en la tegia da Cavardiras sur Mustér sin 2650 meters. Là na procura ella betg mo per il bainstar dals alpinists, mabain metta en pe projects d'art en la cuntrada. L'on passà èsi stà ina performance sin il glatscher en la vischinanza da la tegia.

Ensem cun gidanters ha ella rasà ora blachas sin il Brunnifirn per mussar quant svelto che la naiv e pia ils glatschers livan. L'ARD ha fatg ina reportascha. Uss ha Mena en il chau in'acziun cun il titel «Grenzland». Betg exnum perquai ch'il glatscher sper tegia sa chatta gia sin terren d'Uri – i na va betg per cunfins chantunals. Anzi, l'artista less far visibel in toc Africa – amez la Svizra. Ins dastga esser spannegià.

Claudia en la Chamanna Jenatsch

Il reginavel da *Claudia Drilling* è la Chamanna Jenatsch en la Val Bever damanai-vel dal Güglia. Per l'architecta da Frankfurt sto marschar insatge. Ella ha gugent truscha cun blers giasts e di: «Mintga fatscha cuntenta ma fa happy.»

Ella suna tiba ed il cudesch «Bergfieber» lauda ella sco cuschiniera eccellente. Ils giasts survegnan bizochels fatgs sez e sch'i va bain ed ins gartegia gist il dretg di datti perfin dir-chamutsch cun rösti e sco dessert tiramisù. Tge vul ins dapli?

Claudia e ses um mainan dapi trais onns la Chamanna Jenatsch sin 2652 meters che posseda sco suletta tegia dal SAC ina sauna.

Marlies en la Chamanna Cluoza

Uschiglio fiss ella gea cosmetichera u assistenta da dentist. Dapi quatter onns lavura *Marlies Martig* ensem cun ses um la stad sco guardiachamona. Da la partida è er il figl *Tim*. Il temp che *Tim* manchenta la scola or-

ganiseschan ils geniturs ina magistra privata.

La Chamanna Cluoza è frequentada bain ed i dat la detga travasch. «Ma Marlies, cun sia chavalera cotschna e sia egliada da furbra che regorda a la Zora cotschna, chapescha da restar calma e prender tut cun ina presa umor», scriva l'autura da «Bergfieber».

Tschel temp viva Marlies cun sia famiglia en il Oberland bernais e conceda ch'ella haja l'entschatta gi in zichel stament da surpigiar ina chamona en ina regiun estra nua ch'ins n'ha ni parents ni enconuscents che pon ina giada svelto vegnir a gidar sch'i dat fullas. Er l'heli-copter sgola sulet ina giada il mais e porta rauba per la chamona cun ses 62 plazs da dormir.

Turas – prelecziun a Sent

Sper purtrets fascinants da guardiachamonas en tuttas regiuns svizas porscha il cudesch propostas per turas u raquinta da schabets u da particularitads en connex cun las chamonas, sco per exempel da la naschientscha da las turas da skis en Svizra en la regiun Spitzmeilen.

Ier ha gi lieu la vernissascha dal cudesch a Berna. Ils proxims mais va l'autura *Daniela Schwegler* sin tura. En il Grischun fa ella staziun a Sent nua ch'ella prelegia ils 14 da november en la Grotta da Cultura.

Daniela Schwegler: «Bergfieber – Hüttenwartinnen im Porträt». Rotpunktverlag, 256 paginas, 190 fotos, 38 francs, fanadur 2015, Turig.



Ils giasts èn partids – pinar letgs per ils proxims.



Grondas padellas dovri en la Chamanna Cluoza ch'è frequentada fitg bain.



Trais uras dovran ins a pe da Zernez fin tar la Chamanna Cluoza.